

Aneks VII Naloga supervizora od 26. juna 2007. godine kojim se donosi niz zakona i izmjena i dopuna zakona distrikta Brčko u skladu sa Nalogom supervizora od 02. februara 2007. godine kojim je izmijenjen Statut distrikta Brčko

**ZAKON
O PRAVOSUDNOJ KOMISIJI
BRČKO DISTRIKTA BOSNE I HERCEGOVINE**

I. OPĆE ODREDBE

**Član 1
(Predmet)**

- (1) Pravosudna komisija Brčko distrikta Bosne i Hercegovine (u daljnjem tekstu: Komisija) obezbjeđuje nezavisno i nepristrasno Sudstvo Distrikta, Tužilaštvo Distrikta, Pravobranilaštvo Distrikta i Kancelariju za pravnu pomoć (u daljnjem tekstu: Pravosuđe).
- (2) Ovim zakonom se uređuje opća nadležnost, ovlaštenja, sastav i rad Pravosudne komisije.

**Član 2
(Nezavisnost)**

Komisija je samostalno i od drugih organa vlasti Brčko distrikta Bosne i Hercegovine (u daljnjem tekstu: Distrikt) nezavisno tijelo, koja svoja ovlaštenja obavlja u okviru djelokruga utvrđenog Statutom Brčko distrikta (u daljnjem tekstu: Statut) i zakonima Distrikta.

**Član 3
(Naziv i sjedište)**

- (1) Puni naziv Komisije: Pravosudna komisija Brčko distrikta Bosne i Hercegovine.
- (2) Sjedište Komisije je u gradu Brčko.

**Član 4
(Pečat)**

Komisija ima okrugli pečat s tekstom: "Bosna i Hercegovina, Brčko distrikt BiH, Pravosudna komisija" kružno ispisan ćirilicom i latinicom, a u središtu pečata utisnut je grb Bosne i Hercegovine.

II. IMENOVANJE I RAZRJEŠENJE ČLANOVA KOMISIJE

Član 5 (Sastav Komisije)

- (1) Komisiju čini 8 članova.
- (2) Članovi Komisije su:
 - a) predsjednik Ustavnog suda Bosne i Hercegovine ili sudija tog suda koga on odredi kao svog zamjenika;
 - b) predsjednik Apelacionog suda Distrikta;
 - c) predsjednik Osnovnog suda Distrikta;
 - d) glavni tužilac Distrikta;
 - e) direktor Kancelarije za pravnu pomoć Distrikta;
 - f) pravobranilac Brčko distrikta Bosne i Hercegovine;
 - g) dva građanina Distrikta.
- (3) Članovi Komisije iz stava 2, tački b, c, d, e i f su članovi Komisije po funkciji koju obavljaju.
- (4) Članovi Komisije iz stava 2, tačke g ovog člana su dva građanina Distrikta visokih profesionalnih i moralnih kvaliteta:
 - a) koji nisu bili članovi političkih stranaka u četverogodišnjem periodu koji je prethodio njihovom imenovanju u Komisiju;
 - b) koji nisu članovi političkih stranaka i nisu na bilo koji način uključeni u bilo kakvu političku aktivnost;
 - c) koji nisu javni zaposlenici ili zvaničnici Distrikta, nisu zaposleni u Skupštini Distrikta, Pravosuđu kao ni članovi njihovog porodičnog domaćinstva.

Član 6 (Izbor člana iz reda građana)

- (1) Pravosudna komisija, najmanje mjesec dana prije isteka mandata člana iz reda građana, obavještava Skupštinu o isteku mandata kao i o prijevremenom odlasku.
- (2) Skupština u roku od 15 dana od dana prijema obavještenja objavljuje poziv, lahko dostupan svim građanima, za prijavu na ovu funkciju i u pozivu navodi standarde propisane u tačkama a, b, i c stava 4 člana 5 ovog zakona.
- (3) Rok za prijavljivanje zainteresovanog kandidata na objavljeni poziv je 15 dana.
- (4) Skupština na prvoj narednoj sjednici saziva mandatsko-imunitetsku komisiju koja u roku od tri dana intervjuira sve prijavljene kandidate koji ispunjavaju propisane uslove i odmah nakon sprovedenog intervjua daje preporuku Skupštini za imenovanje. Ukoliko u roku od jednog mjeseca od dana prijema preporuke Skupština ne izvrši imenovanje smatra se da je predloženi kandidat imenovan.

(5) Članovi se biraju na period od četiri godine i ne mogu biti ponovo birani.

Član 7 (Prijevremeno razrješenje)

(1) Članovima Pravosudne komisije prije vremena prestaje mandat u slučaju prestanka funkcije na koju su izabrani, a članovima iz reda građana ukoliko se promijene ili nastupe okolnosti suprotne standardima iz člana 5, stava 4 tački a, b, c i d.

(2) Postupak prijevremenog razrješenja regulisan je podzakonskim aktima Pravosudne komisije.

Član 8 (Imunitet)

Članovi Komisije ne mogu biti pozvani na krivičnu niti građanskopravnu odgovornost za izvršene radnje, date izjave i mišljenja u obavljanju dužnosti člana Komisije.

Član 9 (Dužnosti članova)

(1) Članovi Komisije dužni su čuvati ugled Komisije.

(2) Članovi Komisije dužni su voditi računa o svom ponašanju i ne mogu obavljati aktivnosti koje bi mogle dovesti u pitanje njihovu nepristrasnost, ugled ili integritet.

(3) Nijedan član Komisije ne može biti član političke stranke niti može biti uključen u bilo kakvu političku aktivnost.

Član 10 (Uvid u finansije)

Članovi Pravosudne komisije pojedinačno podnose na uvid Skupštini Distrikta godišnji finansijski izvještaj o svojim ukupnim prihodima, izvorima, imovini i dugovanjima, kao i o prihodima, izvorima, imovini i dugovanjima bliskih članova porodice, do prvog stepena srodstva, te o njihovim načinima sticanja.

Član 11 (Izbor predsjednika i potpredsjednika komisije)

(1) Komisija bira predsjednika i potpredsjednika.

(2) Predsjednik i potpredsjednik Komisije biraju se iz reda članova Komisije. Njihov mandat traje četiri godine, a po isteku mandata mogu biti ponovo birani.

(3) Za izbor predsjednika i potpredsjednika potrebno je prisustvo svih članova Komisije. Biranje predsjednika i potpredsjednika se vrši tajnim glasanjem članova Komisije.

- (4) Svaki član Komisije može predložiti kandidata za funkciju predsjednika i potpredsjednika. Kandidat koji dobije tročetvrtinsku većinu – tročetvrtinsku većinu glasova ukupnog broja članova Komisije izabran je za predsjednika odnosno potpredsjednika Komisije.
- (5) Ako nijedan kandidat ne dobije potrebnu većinu u prvom krugu izbora, održat će se drugi krug izbora. Kandidat koji dobije većinu glasova ukupnog broja članova Komisije u drugom krugu, izabran je za predsjednika Komisije odnosno potpredsjednika.
- (6) Ako nijedan kandidat ne dobije potrebnu većinu glasova u drugom krugu izbora, održat će se treći krug izbora između dva kandidata koji su dobili najveći broj glasova. Kandidat koji dobije veći broj glasova u trećem krugu izbora izabran je za predsjednika, odnosno potpredsjednika.
- (7) Predsjednika u slučaju odsustva zamjenjuje potpredsjednik.

Član 12 (Izuzeće)

- (1) Član Komisije ne može učestvovati u donošenju odluke koja se odnosi na njegovog bračnog druga, srodnika po krvi u pravoj liniji do bilo kog stepena, u pobočnoj liniji do četvrtog, a po tazbini do drugog stepena, i ako postoji druga okolnost koja bi izazvala sumnju u nepristrasnost člana Komisije.
- (2) U slučaju postojanja ovih okolnosti, član Komisije se povlači iz procesa donošenja odluke i pismeno iznosi razloge za izuzeće.
- (3) O razlozima za izuzeće odlučuju ostali članovi Komisije.

Član 13 (Pravo na naknadu)

- (1) Članovima Komisije iz člana 5, stava 2 tački a i f pripada pravo na naknadu po osnovu učešća u radu Komisije i pravo na naknadu putnih troškova dolaska na sjednice Komisije izvan teritorije Distrikta.
- (2) Visina naknade iz stava 1 ovog člana utvrđuje se Poslovníkom o radu Komisije.

III. NADLEŽNOSTI I NAČIN RADA KOMISIJE

Član 14 (Opće nadležnosti)

Komisija obavlja slijedeće poslove:

- a) obezbjeđuje nezavisnost Osnovnog i Apelacionog suda, Tužilaštva Distrikta, Kancelarije i Pravobranilaštva;
- b) obezbjeđuje stručno usavršavanje sudija, tužilaca, pravobranioca, advokata Kancelarije, i stručnih saradnika u pravosuđu i Tužilaštvu Distrikta;
- c) donosi i sprovodi etički kodeks zaposlenih u pravosuđu (izuzimajući sudije Osnovnog i Apelacionog suda), zaposlenih u Tužilaštvu (izuzimajući tužioce), Pravobranilaštvu, Kancelariji i pokreće disciplinski postupak zbog kršenja kodeksa;
- d) imenuje i razrješava pravobranioca i njegove zamjenike;
- e) imenuje i razrješava direktora Kancelarije i advokate Kancelarije;
- f) imenuje i razrješava stručne saradnike i pripravnike u Osnovnom i Apelacionom sudu, Tužilaštvu Distrikta, Kancelariji i Pravobranilaštvu Brčko distrikta BiH;
- g) imenuje i razrješava službenike i namještenike Pravosudne komisije, Apelacionog i Osnovnog suda, Tužilaštva Distrikta, Pravobranilaštva i Kancelarije;
- h) priprema i dostavlja Skupštini zakone koji se odnose na organizaciju i rad Apelacionog i Osnovnog suda, Tužilaštva Distrikta, Pravobranilaštva, Kancelarije, kao i na regulisanje rada advokata i notara u Distriktu;
- i) imenuje notara i reguliše rad notara u Distriktu;
- j) priprema i predlaže Skupštini onaj dio budžeta kojim se obezbjeđuju operativni troškovi za rad Apelacionog i Osnovnog suda, Tužilaštva Distrikta, Pravobranilaštva, Kancelarije i za rad Pravosudne komisije;
- k) ostvaruje saradnju s ministarstvima pravde i drugim nadležnim institucijama u BiH;
- l) izabire člana za Visoko sudsko i tužilačko vijeće BiH;
- m) utvrđuje potreban broj advokata Kancelarije za pravnu pomoć;
- n) donosi ili daje saglasnost na pravilnike kojima se reguliše rad Apelacionog i Osnovnog suda, Tužilaštva Distrikta, Pravobranilaštva, Kancelarije i stručne službe Pravosudne komisije;
- o) donosi pravilnike o uslovima za obavljanje poslova vještačenja i poslova sudskih tumača;
- p) imenuje i razrješava dužnosti komandira Sudske policije i određuje broj sudskih policajaca;
- q) objavljuje javni konkurs i vrši izbor za sva upražnjena radna mjesta službenika i namještenika u Apelacionom i Osnovnom sudu, Tužilaštvu Distrikta, Kancelariji, Sudskoj policiji, Pravobranilaštvu i stručnoj službi Pravosudne komisije;
- r) najmanje dva puta godišnje razmatra izvještaj o radu Apelacionog i Osnovnog suda, Tužilaštva Distrikta, Pravobranilaštva, Kancelarije i Komisije, te ih u vidu informacije dostavlja Skupštini ukoliko nije drugačije regulisano posebnim zakonima;
- s) koordinira projekte koje je pokrenulo Vijeće, a koji se odnose na poboljšanje rada sudova i Tužilaštva i efikasnost upravljanja predmetima;
- t) unapređuje rad Pravobranilaštva, Kancelarije i stručne službe Pravosudne komisije;
- u) obavlja i druge poslove utvrđene Ustavom BiH, Statutom Brčko distrikta BiH i zakonima.

Član 15
(Izbor člana za Visoko sudsko i tužilačko vijeće)

Komisija bira člana za Visoko sudsko i tužilačko vijeće Bosne i Hercegovine iz reda sudija i tužilaca Brčko distrikta u skladu s procedurom koju je propisalo Vijeće.

Član 16
(Sjednice)

- (1) Komisija odlučuje u sjednicama.
- (2) Sjednicu Komisije saziva predsjednik Komisije, a u njegovoj odsutnosti potpredsjednik Komisije.
- (3) Sjednica može biti sazvana i na prijedlog najmanje dva člana Komisije.
- (4) O održavanju sjednice članovi moraju biti obaviješteni lično, telefonom, faksom, e-poštom, poštom, najkasnije osam (8) dana prije zakazane redovne sjednice. Ako se zakazuje vanredna sjednica rok za obavještenje je 48 sati prije održavanja sjednice.
- (5) Sjednica Komisije ne može se održati ukoliko nisu prisutni predsjednik ili potpredsjednik i najmanje četiri (4) člana.

Član 17
(Donošenje odluka)

- (1) Komisija donosi odluke većinom glasova prisutnih članova. Glasanje je u pravilu javno, a tajno ako je tako određeno podzakonskim aktima ili odlukom Komisije.
- (2) U slučaju izjednačenog broja glasova, glasanje se ponavlja. Ukoliko je ponovo izjednačen broj glasova, predsjednik Komisije se izjašnjava javno i njegov glas je odlučujući.

Član 18
(Predsjednik Pravosudne komisije)

- (1) Predsjednik predstavlja i zastupa Pravosudnu komisiju.
- (2) Predsjednik Komisije saziva sjednice, utvrđuje dnevni red i predsjedava sjednicama.
- (3) Predsjednik komisije i svi članovi mogu predlagati donošenje odluka, rješenja, zaključaka i drugih akata iz nadležnosti Komisije.
- (4) U odsustvu predsjednika zamjenjuje ga potpredsjednik.

Član 19 (Način rada)

Način rada Komisije utvrđuje se poslovníkom o radu Komisije.

IV. STRUČNA SLUŽBA PRAVOSUDNE KOMISIJE

Član 20 (Pružanje usluga)

- (1) Tehničko-računovodstvene, poslove informacione tehnologije, stručne i administrativne poslove za potrebe pravosuđa obavlja Stručna služba Pravosudne komisije.
- (2) Rad Stručne službe, broj službenika i namještenika, poslovi i zadaci, i uslovi za popunjavanje radnih mjesta uređuju se podzakonskim aktima.

Član 21 (Sekretar)

- (1) Komisija ima sekretara.
- (2) Sekretara bira Komisija na period od četiri godine i može biti ponovo izabran.
- (3) Za sekretara može biti izabrano lice koje ima završen pravni fakultet s položenim pravosudnim ispitom i tri godine radnog iskustva na pravnim poslovima nakon položenog pravosudnog ispita.
- (4) Sekretar Komisije obavlja pravne, stručne i administrativne poslove iz nadležnosti Komisije, priprema sjednice, vodi zapisnike i obavlja sve druge poslove propisane podzakonskim aktima.
- (5) Sekretar je odgovoran za rad službenika i namještenika u Stručnoj službi, a za svoj rad odgovoran je Pravosudnoj komisiji i predsjedniku Komisije. U izvršavanju poslova sekretaru pomaže portparol i zamjenjuje ga u njegovom odsustvu.

Član 22 (Portparol)

- (1) Komisija ima portparola.
- (2) Portparola bira Komisija u stalni radni odnos i ima status službenika.
- (3) Za portparola može biti izabrano lice koje ima završen pravni fakultet s položenim pravosudnim ispitom i tri godine radnog iskustva na pravnim poslovima.

Član 23 (Javno informisanje)

Portparol Pravosudne komisije obavještava javnost o radu Apelacionog i Osnovnog suda, Tužilaštva Distrikta, Kancelarije za pravnu pomoć i Pravosudne komisije i vodi postupak pristupa informacijama u skladu sa Zakonom o slobodi pristupa informacijama u Bosni i Hercegovini.

V. POPUNJAVANJE RADNIH MJESTA

Član 24 (Postupak zapošljavanja)

- (1) Pravosudna komisija, na principu otvorene konkurencije, neposredno sprovodi postupak zapošljavanja direktora i advokata Kancelarije, sekretara Komisije, stručnih saradnika, sekretara suda, portparola, pravobranioca i zamjenika pravobranioca i komandira Sudske policije.
- (2) Postupak zapošljavanja drugih službenika i namještenika sprovodi se po postupku i u skladu sa zakonom koji uređuje postupak zapošljavanja službenika i namještenika.

VI. FINANSIRANJE RADA PRAVOSUDNE KOMISIJE

Član 25 (Sredstva za rad)

- (1) Sredstva za rad Komisije obezbjeđuju se iz budžeta Distrikta.
- (2) U budžetu su precizno prikazani proračuni rashoda Komisije za tekuću fiskalnu godinu.

Član 26 (Priprema i izvršenje budžeta)

- (1) Predsjednik Komisije u saradnji sa Stručnom službom sačinjava prijedlog budžeta Komisije i dostavlja ga Komisiji, radi utvrđivanja konačnog prijedloga budžeta.
- (2) Komisija razmatra dostavljene prijedloge budžeta Apelacionog i Osnovnog suda, Tužilaštva, Kancelarije, Pravobranilaštva i Komisije i sačinjava konačni prijedlog budžeta koji dostavlja Skupštini.
- (3) Predsjednik Komisije prisustvuje sjednicama Skupštine i skupštinskih organa na kojima se raspravlja o budžetu i pitanjima koja se tiču budžeta i zastupa predloženi budžet.
- (4) Predsjednik je odgovoran za izvršenje budžeta Komisije.

Član 27
(Plaće i naknade)

- (1) Službenici i namještenici zaposleni u Stručnoj službi Komisije imaju pravo na plaću i druge naknade u skladu sa zakonom koji uređuje pitanja o plaćama i naknadama službenika i namještenika u Komisiji.
- (2) Članovi Komisije imaju pravo na naknadu kako je to regulisano ovim zakonom.

VII. PRIJELAZNE I ZAVRŠNE ODREDBE

Član 28
(Prestanak važenja zakona)

Danom stupanja na snagu ovog zakona, prestaje važiti Zakon o Pravosudnoj komisiji Brčko distrikta Bosne i Hercegovine ("Službeni glasnik Brčko distrikta BiH", broj: 4/00), kao i Zakon o izmjenama i dopunama Zakona o Pravosudnoj komisiji Brčko distrikta Bosne i Hercegovine ("Službeni glasnik Brčko distrikta BiH", brojevi: 1/01 i 5/01)

Član 29
(Rok za donošenje podzakonskih akata)

U roku od 6 mjeseci od dana stupanja na snagu ovog zakona Komisija će donijeti podzakonske akte.

Član 30
(Objavljivanje i stupanje na snagu)

Ovaj zakon stupa na snagu 8. (osmog) dana od dana objavljivanja u "Službenom glasniku Brčko distrikta Bosne i Hercegovine".